

Ang Pangasaw-onon isip Hiniusang Mag-aaway

Basahong Kasulatan: Efe. 6:10-20

I. Gipadayag sa Efeso 6:10-20 nga ang pangasaw-onon mao ang hiniusang mag-aaway nga makig-away batok sa kaaway sa Dios alang sa gingharian sa Dios:

- A. Mause na ngani sa Dios ang madaogong maghihigugma ni Cristo aron mahimong puluy-anan sa Dios, sa panan-aw sa Dios maanyag siya sama sa Tirsang ug matahom sama sa Jerusalem; apan, alang sa kaaway makalilisang siya sama sa kasundalohang dunay mga bandila—A. A. 6:4:
 - 1. Nagpakita ang mga bandila sa pagkaandam nga makig-away ug timaan sab nga nakadaog na; nagtimaan ang makalilisang nga kasundalohan nga makapalisang ang mga mananaog sa kaaway sa Dios, nga si Satanas.
 - 2. Makig-away sa gubat kining kasundalohana alang sa gingharian sa Dios sa pagkadaot sa katawhan sa Dios aron mahimong mga mananaog nga motubag sa pagtawag sa Ginoo (Bug. 2:7, 11, 17, 26; 3:5, 12, 21); sa kataposan, mahimong hiniusang pangasaw-onon ang mga mananaog nga maminyo ni Cristo (Bug. 19:7-9); human sa ilang kasal, mahimong kasundalohan kining pangasaw-onon nga makig-away uban ni Cristo, nga iyang Bana, aron pildihon si Anticristo ug ang tanan niyang magsusunod (vv. 11-21).
- B. Ang iglesia nga pangasaw-onon mao gyod ang hiniusang tawo diha sa tuyo sa Dios, nga motuman sa duha ka pilong tuyo sa pagpadayag sa Dios ug pagbatok sa kaaway sa Dios—Gen. 1:26.
- C. Dili lang nga tumanon gyod ang walay kataposang tuyo sa Dios ug tagbawon ang tinguha sa kasingkasing ni Cristo, kondili pildihon sab gyod ang kaaway sa Dios; alang niini, mag-aaway gyod ang iglesia.
- D. Alang sa pagtuman sa tuyo sa Dios ang paggawi nato, alang sa katagbawan ni Cristo ang pagkinabuhi nato, ug alang sa pagpildi sa kaaway sa Dios ang pakig-away nato—Efe. 4:1; 5:2, 8; 6:10-11.

II. Ang panghimatuod ni Jesus sa panahon sa millennium mao ang pangasaw-onon ni Cristo—ang mga mananaog nga mga masigka-hari ni Cristo—Bug. 19:7-9; 20:4, 6:

- A. Alang sa pag-andam sa pangasaw-onon ni Cristo ang pahuli sa Ginoo (19:7-9; 21:2); sa kaulahian, masama ta sa matahom nga Shulamitanhon, nga isip hulad ni Salomon, mao ang kinadak-an ug kinasang-ang hulagway sa Bag-ong Jerusalem isip kapikas, pangasaw-onon, ni Cristo (A. A. 6:13; Bug. 21:2, 9-10; 22:17a).
- B. Gipakasama ang Shulamitanhon sa sayaw sa duha ka kampo, o duha ka kasundalohan (Heb. *mahanaim*), sa panan-aw sa Dios; human makita ni Jacob ang mga manulonda sa Dios, ang duha ka kasundalohan sa Dios, ginganlan niyang Mahanaim ang dapit nga nahimutangan niya ug gibahin niya ang iyang mga asawa, mga anak, ug mga katigayonan ngadto sa “duha ka kasundalohan”—A. A. 6:13; Gen. 32:1-10:
 - 1. Ang espirituhanong kahulogan sa duha ka kasundalohan mao ang lig-ong panghimatuod nga labi pa tang magmadaogon, modaog gyod ta pag-ayo, pinaagi Niya nga nahigugma nato segun sa prinsipyo sa Lawas ni Cristo—Rom. 8:37; 12:5; Deut. 32:30; Eccl. 4:9-12.

2. Dili gusto ang Dios sa mga kusganon sa ilang kaugalingon; kadto rang mga mahuyang, mas maluyahon, mga babaye ug mga bata ang gusto Niya; ang maisip nga angayan mahimong mga mananaog mao ang mga mas maluyahon nga nagsalig sa Ginoo—1 Cor. 1:26-28; 2 Cor. 12:9-10; 13:3-5; A. A. 8:6.
3. Nagkinahanglan ang Dios og mga tawong nausa Niya, mga tawong mapasakopon Niya, nga gitiman-an sa sinalapid nga buhok (1:11), ug masinugtanon Niya nga dunay mapahaomong pagbuot, nga gitiman-an sa liog nga dunay mga kulintas nga alahas (v. 10).
4. Kon maghunahuna ta unsaon nato pag-abot sa kinahabogang punto sa dios-nong pinadayag, dili gyod ta mosalig sa atong kaugalingon, mosalig hinuon ta sa Ginoo ingon nga gugma, gahom, ug kaluoy aron mahimo tang mga sudlanan sa kaluoy, kadunggan, ug himaya—Rom. 9:16, 21-23.

III. Gikinahanglan ang espirituhanong pakig-away kay batok man sa kabubut-on sa Dios ang kabubut-on ni Satanas—Efe. 1:5, 9, 11; Mat. 6:10:

- A. Dugang sa tuyo sa Dios, sa pagbuot sa Dios, naay ikaduhang tuyo, ikaduhang pagbuot, kay niatbang man ang satanasnong pagbuot sa pagbuot sa Dios—Isa. 14:12-14.
- B. Naggikan sa panagsumpaki sa kabubut-on ni Satanas ug sa kabubut-on sa Dios ang tanang pakig-away.
- C. Pakig-away tali sa gingharian sa Dios ug sa gingharian ni Satanas ang espirituhanong pakig-away; aron maestablisar ang gingharian sa mga langit, gikinahanglan ang espirituhanong pakig-away—Mat. 12:26, 28; Bug. 12:11.
- D. Maggawi ta segun sa kamatuoran ug pinaagi sa grasya, magkinabuhi ta diha sa gugma ug kahayag, ug makig-away ta aron mapildi ang satanasnong pagbuot—Efe. 4:1; 5:2, 8; 6:12.

IV. Sa pagbatok sa kaaway sa Dios, magpagahom gyod ta sa kadako sa gahom nga nagbanhaw ni Cristo gikan sa mga minatay ug nagpalingkod Niya sa mga langit, labaw sa tanang daotang espiritu sa kahanginan—v. 10; 1:19-22:

- A. Ang kamatuoran nga magpagahom gyod ta diha sa Ginoo nagpasabot nga sa atong kaugalingon dili ta makaaway sa espirituhanong pakig-away batok ni Satanas ug sa daotang gingharian niya; makaaway lang ta diha sa Ginoo ug sa gahom sa Iyang kusog.
- B. Ang sugo nga magpagahom nagpasabot nga gamiton gyod ang atong pagbuot; kon buot tang magpagahom alang sa espirituhanong pakig-away, kinahanglang lig-on ug gigamit gyod ang atong pagbuot—A. A. 4:4; 7:4.

V. Ang pakig-away tali sa iglesia ug ni Satanas pakig-away tali nato nga nahigugma sa Ginoo ug naa sa Iyang iglesia ug sa daotang kagamhanan sa kalangitan—Efe. 6:12:

- A. Ang mga magbubuot, mga pagbulot-an, ug magbubuot-sa-kalibotan ning kangitngitan mao ang masupilong mga manulonda nga nisunod ni Satanas sa pag-alsa niya batok sa Dios ug maoy nagbuot karon sa kalangitan ibabaw sa kanasoran sa kalibotan—Col. 1:13; Dan. 10:20.
- B. Makaamgo gyod unta ta nga ang atong pagpakig-away dili batok sa mga tawo kondili batok sa daotang mga espiritu, sa espirituhanong kagamhanan diha sa kalangitan.

VI. Dili tinagsa ang espirituhanong pakig-away; may kalabotan kini sa pangasaw-onon ni Cristo isip hiniusang mag-aaway—Efe. 6:13:

- A. Hiniusang mag-aaway ang iglesia, ug nag-umol ning hiniusang mag-aaway ang tanang magtutuo; human ta maporma nga hiniusang kasundalohan, makaaway na ta batok sa kaaway sa Dios.
- B. Ang estratehiya sa Dios paggamit man sa iglesia nga kasundalohan Niya sa pagpakig-away batok sa kaaway; ang estratehiya ni Satanas pagpabulag man kanato sa iglesia nga kasundalohan sa Dios.
- C. Alang sa Lawas ang tibuok hinagiban sa Dios, dili sa tinagsa; ang hiniusang mag-aaway ray makasul-ob sa tibuok hinagiban sa Dios.

VII. Aron makaaway sa espirituhanong away, isul-ob gyod nato ang tibuok hinagiban sa Dios—v. 11:

- A. Ang Dios diha ni Cristo nga realidad sa atong pagkinabuhi mao ang bakos nga naglig-on sa tibuok natong pagkatawo alang sa espirituhanong pakig-away—v. 14a.
- B. Ang tabon-sa-dughan sa pagkamatarong nga nagtabon sa atong konsensya ug nagbantay nato sa mga pag-akusar ni Satanas mao si Cristo nga pagkamatarong nato—v. 14b; 1 Cor. 1:30.
- C. Si Cristo ang panagdait aron mausa ta sa Dios ug sa mga balaan; kining kadaita mao ang lig-ong patukoranan nga makapabarog nato batok sa kaaway—Efe. 2:15; 6:15.
- D. Ang pagtuo mao ang kalasag batok sa nagdilaab nga mga udyong sa kaaway; si Cristo ang Mag-uugda ug Maghihingpit nianang pagtuoha—v. 16; Heb. 12:2.
- E. Ang salukot sa kaluwasan nga nagtabon sa atong hunahuna mao si Cristo nga nagluwas nga masinati nato sa inadlawng kinabuhi nato—Efe. 6:17a; Juan 16:33.
- F. Ang espada sa Espiritu, ang Espiritu nga mao ang pulong sa Dios, mao ang hinagibang pang-asdang nato nga itagudtagod nato sa kaaway—Efe. 6:17b.
- G. Ang pag-ampo mao ang bugtong-talagsaon, mahinungdanon, ug kinahanglanong paagi nga ikaaplikar nato ang tibuok hinagiban sa Dios, maghimo sa tanang butang sa hinagiban nga magamit nato sa praktikal nga paggamit—v. 18.

VIII. Sa pagsul-ob nato sa tibuok hinagiban sa Dios, makabarog ta batok sa mga laraw, sa daotang mga plano, sa yawa—vv. 11, 13-14:

- A. Ang paglingkod uban ni Cristo pag-ambit man sa tanan Niyang nahuman, ang paggawi diha sa Iyang Lawas mao ang pagtuman sa walay kataposang tuyo sa Dios, ug ang pagbarog diha sa Iyang gahom mao ang pagpakig-away batok sa kaaway sa Dios—2:6; 4:1; 5:2, 8; 6:11, 13-14.
- B. Sa pagpakig-away nato batok sa kaaway, ang labing importanteng butang mao ang pagbarog; sa mabuhat na nato ang tanan, mobarog gyod ta hangtod sa kataposan.

IX. Kinahanglan makakita tang tanan nga sa pahuli sa Ginoo karon naa ta sa panggubatan; mobulig gyod ta sa Ginoo nga makig-away sa pwersa ni Satanas sa kahanginan aron labi pa natong mabatonan si Cristo aron matukod ang Lawas Niya ug maandam ang pangasaw-onon Niya, magtukod ug magpakaylap sa gingharian sa Dios aron makabalik si Cristo ug manunod sa yuta.